

太

函

集

太函集卷之九十二

新都汪道昆伯玉著

疏三首

邊務疏

題臣閱視薊昌二鎮軍馬邊關查議軍餉事畢謹
先陳當務之急以備及時

采擇施行竊以薊昌延袤二千里而遙

京師距塞外二百里而近宜必設險以守然後廉
遠堂高近該先今總督撫鎮諸臣沿邊築空心
臺一千二百餘座宿兵貯器戍守有常頃賊虜

睥睨石門再至皆敗遁去使非有臺可據安能
露衆待之彼乘我虛誰卜其夜薊莫利於守守
莫利於臺此其明驗較著者也臣循牆徧歷登
臺迺觀我

國家萬世夷夏之防美哉壯矣凡諸要害部署已
周獨灤河以東居庸以西若松棚諸路中稍有
間缺大約增臺二百座始爲完工查得先任總
督譚綸原議築臺三千座其後僅舉其半旣又
減其半之什二三徒以物料人工悉出兵力計
一臺之直不啻千緡公帑所償十不當一懼不

堪命不得不暫休之力詘時艱非得已也臣先
在行役輒有意乎增臺於是猶持兩端未敢輕
出諸口蓋自邊事起諸軍日在守邊比年稍寧
百廢具舉無論臺垣壕塹城堡關梁戎署教場
營房倉廩他如神祠學舍公宇成樓道路隄防
紛紛諸役久則累歲多或千楹率皆以兵爲傭
不遺餘力此宜休養之時也主將以練兵爲職
亦既有年工作頻仍竟未遑暇乃今兵制更始
具有章程此宜訓練之時也比臣以會計軍餉
復及春防查得各兵仍受他工未得專練雖云

一切工作莫非公家要以審擇便宜則邊臺爲急與其赴他工而荒本業盍自其急者先之近謀者言東虜日伺灤東西虜或有東意有備無患夫非武之善經與臣請

申命境內當事諸臣及今相地宜合兵力增臺二百座祇以一防爲期往者分工取數寡而責效衆及今分數倍昔以衆舉輕往者給價有差每座多則百兩今亦倍給使之採辦有資此以佚道使之勞不怨矣卽如臺二百座計直不下二十萬緡今雖有加不四萬而足願行山東河南二

省取解節欠薊鎮民運折銀各二萬兩辦此有
餘如或未徵聽彼借解追補事可立集不假旁
求儻以春防已深秋防伊邇今歲但以班軍分
應諸役勿及其餘期以來春一舉畢事臺工既
竣務守成言自後主客官軍諸役悉無所與亟
令專習武事以責成功班軍精壯者一體練之
次者不隸戎行使之專任力役然須以漸修舉
爲之調停如復政出多門其不堪滋甚矣自今
伊始境內大小工役諸司毋得專行必先關白
軍門檄下主將調撥蓋以督鎮並觀兼領庶幾

不失緩急之序張弛之宜上無侵官中無廢事
下無煩令矣大抵薊事綱維已振條目猶或稍
踈慮以什全寧能必獲夫何故兵未及練故也
假令地利旣設務收一勞永逸之功軍志不分
可免一暴十寒之患如此而兵有不練練有不
精諸將無所藉口矣伏候

勅下該部覆議倘以臣言不謬屬當事者及時舉行
未雨綢繆其誰敢侮是或一道緣係邊務事理
未敢擅便爲此具本專差百戶袁勲親齎謹題
請

申飭通州兵馬疏

題爲申明薊昌防秋事宜以重根本以保萬全事
據密雲兵備副使王一鶚呈蒙臣牌仰該道會
同本部職方清吏司郎中左廕前去通州查閱
見在軍馬精壯若干孱弱若干叅將所部一營
原議二千四百名果否足用見在入選之數如
或不充應俟清解選補馬匹料草或照京營全
給或照主兵坐支查明議擬歸一通詳會議具
奏施行蒙此依蒙會同左郎中前去通州公同叅

將金璋查閱得該營原額軍士二千九百名節
年逃故七百一十名見在二千一百九十名內
精壯者僅二千三十二名可備巡邏防禦之用
其餘一百五十八名率皆孱弱應發守城若照
近議額以二千四百爲一營尚欠三百六十八
名候清解新軍選補查得支糧通例營操者月
支一石城操者月支八斗本營既改營操之兵
似難餉以城操之餉馬匹草料在京營則經年
常支在張家灣備禦營亦照此例在外主兵則
冬止支料春支料草夏秋牧青通州與張家灣

事體相同似又非主兵比矣該營先有馬二百一十三匹春冬支料後給三百匹止給料草二月卽行住支是且不得同於在外主兵無論京營也今若以五百爲額照外鎮主兵例計之應加春草者僅二百加料草者三百費亦不多卽不得與京營同然較之經年不給者軍力亦稍舒矣又查得備禦營馬倒死者止追解椿銀馬於太僕寺請發不以朋銀累軍邇者薊鎮諸營亦皆給價買補惟通州營尚扣朋銀以後似宜比照備禦營馬事例庶養馬不至於累軍而諸

軍不苦於領馬具由呈報到臣卷查先該本道
呈蒙臣批據通州叅將金璋呈據中軍朱九成
呈蒙本道案驗蒙總督案驗准戶部咨欵開一
議處軍糧該衛月糧今議於三千名內減去六
百名卽以六百名之糧加添前軍共支一石以
其所損卽爲所增但支糧則例衛軍定以八斗
通州係腹裏衛分與邊軍勞逸大不相同若一
旦增添他衛必至比例而邊軍亦不心服且前
軍額數勢不可缺他日清查補足則見在支糧
一石者不可復減而將來補役者又何將以處

給是暫減而實增也議將各軍月糧照常支給
八斗若他日補足三千仍照舊例查支一議處
馬匹本營新領馬三百匹除五六月草茂之
日自行牧放待八九月係防秋日期姑准給與
草料二箇月以後不准支給聽兵部另議查處
等因蒙此照得近日各軍因月糧不足養贍日
漸迹移僅有二千餘人前項馬匹兌領到營分
布各路巡邏計今年餘止關料草二箇月貧軍
自備喂養負累不前卽如軍人王八兒因馬自
縊身死薛臣等一十三名棄馬迹脫審言等一

十八名將馬餓死本營兵馬原備巡緝近京盜賊及有警聽調應援之數軍逃軍損目今已極呈乞早爲議處等因蒙批仰密雲兵備道查議通議蒙此查隆慶五年十一月內蒙督撫案驗准兵部咨准本部石侍郎咨一欵議處軍糧看得通州軍士原額三千見在實數未足其中尚有老弱不堪防守議要揀選精丁二千四百名每名除月給糧八斗外再加二斗糧不踰數軍困稍甦一欵議處馬匹通州營見在騎操馬止二百餘匹且減革料草致馬瘦損不堪防禦

議太僕寺將寄養馬再給數百料草照京營事
例給與該本部覆議通行依擬備行該鎮督撫
等官卽將通州見在軍士三千名挑選精壯二
千四百責令叅將從實操練其減退六百名該
糧四百八十石就充見軍全糧之數移咨戶部
會計其馬匹行令太僕寺將寄養馬量撥三百
匹令叅將督軍用心喂養其草料無分新馬舊
馬照依京營全季給領不宜減革以累貧軍等
因題奉

欽依備咨案仰本道轉行欽遵間隆慶六年五月內

又蒙督撫案驗准戶部咨該本部題覆前事將各衛軍士月糧照舊止支八斗新兌馬匹料草止支兩月題奉

欽依備咨案仰本道又經轉行通州叅將欽遵外今蒙前因照得通州內護

都門外衛漕廩遇警應援先守以勲貴鎮以重兵其後承平改爲分守庚戌之後又改副總兵近年以來始改叅將秋防有警仍添發京營兵保定兵守之隆慶四年又議以大臣駐守顧兵有常操京營者有班戍邊塞者止餘三千爲叅

將部練今復凋耗者什之三往年兵部石侍郎
駐守其地洞知矢養之弊且慮增餉之難議減
三千者爲二千四百名增糧之八斗者爲一石
蓋移三千之餉以餉此二千四百之兵亦大不
得已之計也兵部題

允之後士知有生不謂依違歲終不決猶復至此今
兵日以逃馬莫爲牧甚至有因不能養馬而自
甘心者無論塞下緩急卽郊關有道路之梗何
所措手合無軫念重地特爲題

請仍照原議施行備由具呈到臣據此又經牌仰該

道會同郎中左熙查閱議擬去後續據前因臣
隨會同總督右都御史劉應節巡撫右僉都御
史楊兆議照通州當

京師之肘腋控水陸之咽喉地至重也故一城之
內五衛之兵在焉乃今則惟二千有奇兵至寡
矣無事則分部巡緝與京營之捕兵同有事則
調遣應援與邊營之戰兵同亦至勞矣語其將
則署銜爲分守迄今未有專營語其兵則各衛
以邊戍爲急諸軍以京操爲利其剩者爲城操
迄今未有定伍緣以營制未定分數未明故糧

雖不支而莫敢言兵雖日耗而莫之詰往年本部侍郎石茂華駐守親見其狀始議及之次年臣始入部中次當駐守祇循故事亟就督撫問兵又查部例遇警則徵保定三千以備緩急于時彼軍之情狀各鎮之部伍臣未周知比臣閱視首次通州各軍皆小杖短衣苦有饑色而詰通州叅將言彼初至各軍赤立偃偻不啻懸鵠今茲小杖短衣猶出督責借貸取辦直爲應閱地耳閱畢則懸鵠如故又惡能軍臣惟通州無

論

國儲且通

貢道往聞間者謂虜嘗垂涎於此故屬部臣備之
乃今重地羸師恐非所以示異國也及臣閱薊
手籍額兵畫地分管卒無及通州者既閱保定
問誰爲守通州舊皆倉卒以應師期迄無定議
夫部臣之倚各鎮如此而各鎮之應部臣如彼
卽有徵召可爲寒心顧茲軍僅二千馬僅五百
誠知其不足賴亦猶賢於無兵徒計斗粟束芻
將令空壘以守疆幹之義固如是乎且各衛城
操皆隸守備而通州特設叅將官制自殊有叅

將必有兵管有兵營必有兵額特前此未之講耳乃今營以通州爲名額以二千四百爲準管額既定何敢踰額而增兵卽有清解新軍畢入城操之數管操則如例月支一石城操則如例月支八斗又何敢援例而增餉此皆明白易見也近以近京多盜責在通州而追捕巡邏非馬不可況在防禦調遣尤必資焉本部議例京管誠爲一體其後止給料草二月臣誠不知其所由來臣請平其議以備

折衷亦必以例主兵爲當馬有倒死卽照備禦馬例

並免朋銀止追椿銀仍聽兌給頃定兵額昌平
已立車營通州亦必得車營而後可出城劄守
薊鎮故有戰車遲重者或病難行通州則非趨
利遠援卽得車一營附以火器足以威敵雖有
勁虜又何敢薄近郊比臣議保定車營亦將爲
入衛計如果調赴通州則二車營可爲犄角其
利居多本營額兵二千四百名則以一千八百
爲車兵五百爲騎餘爲中軍雜流亦兵制也見
在不足之數候清勾選補不堪營操者另籍以
充城操無事則騎者分番巡邏步者專習推輓

擊刺有事則步騎合營以備戰城操分陴以在
守守城者亦聽叅將合練不以出征如此則兵
雖不及三千皆得實力餉雖加給二斗皆得實
用抑亦可以爲一旅矣伏乞

勅下戶兵二部再加詳議如果臣等所言不謬早
爲

題覆施行庶使重地裨威羸師作氣臣等可幸無
罪矣

題請督撫主將疏

題臣奉

命閱視薊遼保定邊務

勅諭開載邊臣果能件件整飭著有勞績者照擒斬
例題請陞賞如踵襲故套推諉誤事照失機例叅
劾欽此查得先該兵部題爲申飭薊昌防秋事宜
以重根本以保萬全事內開薊遼二鎮虜患未
息比之宣大等七鎮保定一鎮邊情稍寧者不
同閱視大臣至日亦當稍從寬假等因素奉

聖旨依議行欽此臣悉欽遵祇役惟謹躬率郎中左
熙副使楊樞王一鶚周歷邊境畢閱戎行因事
考成循名核實就各鎮修守之狀課諸臣幹濟

之勞既不敢循故事而應虛文亦不敢務苛求
以傷大體除綜核八事各另具冊敷陳境內庶
官各另具疏舉劾外要以各鎮邊務責在總督
鎮巡諸臣卽比年之課績有差則諸臣之宣力
自見謹陳其槩惟

聖明垂聽焉臣惟

國家列三輔以翊

京師設三關以距夷狄經制大備疆場永平薊門
晏然兵革未試頃自庚戌不備邊警遂開于是
薊鎮始設督臣兼攝遼東保定直將以據要害

布聲援如復虜伺薊門則東西援兵不待傳檄而至蓋

陵京重則薊重薊重則遼東保定均重矣虜旣得志視薊耽耽雖

中國不憚征發以應之卒不能禦惟先任總督楊博距虜土牆制勝萬全其功最著其餘率相繼受法間一二得免焉于時修邊擺邊增兵增餉大都取辦倉卒不遑永圖比虜長驅如入無人之境由是

朝廷益嚴督責權貴益肆要求將官益務彌縫邊

事益就廢弛幸而

先帝與羣臣更始不事煩苛任將擇人悉由

廟略乃若破拘格任便宜以守則有臺有牆以戰則
有車營有火器一新耳目宜莫如先任總督譚
綸之功居多當是時總理練兵則戚繼光巡撫
則劉應節整飭兵備則楊兆類皆同心戮力經
始建功及應節以總督代綸兆以巡撫代應節
先帝方受西酋納款

申飭邊防用是諸臣皆得乘閑暇以明政刑罔敢自
佚勸作力役首畢臺工增募南兵以備列戍循

墻廣置石砲深剗偏坡凡所以爲守者浸備矣
明部伍定章程增置車營輜重營更造虎蹲砲
大將軍砲刻期合練十萬之衆如一心凡所以
爲戰者浸備矣至若禁科歛禁鑽求以嚴紀律
議椿朋議撫賞以恤困窮慎間諜謹烽堠以偵
虜情裁冗費汰糜軍以紓

國計乃今以戰則什得五六以守則什得七八較
之疇昔相去不啻倍蓰例之各邊亦旣燦然可
覩矣今歲黠虜潛至不旬月而破之者三此明
驗也顧惟主兵之力役不輟客兵之更易無常

歲月坐馳未遑訓練語精兵之足恃者在主兵
惟鎮守標下奇兵五百次則標營在客兵惟南
兵萬人次則延綏遼東三旅耳閱標兵則三屯
各營差勝遵化次之密雲又次之開路兵班兵
則直取壯觀或以具數要以得地形利器用薊
固有之軍政已張卒未服習則未練之故也頃
臣請增築邊臺以資守專練主兵以資戰豈非
今日之急務乎昌平捍衛

陵京最爲重地以故特設主將增設監司顧將士旣
有分部號令不通督撫遠在一方心力不逮兼

以官守鮮同心之效軍興有掣肘之虞必俟其
有急而後自薊赴之恐無及矣遼東負山阻海
地若綴旒周折逶迤延二千里東備土蠻諸部
西備三衛諸夷先年境內富强胡馬遠牧頃者
兵荒洊至先後七年農畝汗萊丁夫溝塹其禍
極矣餉額自昔爲儉僅當他鎮之什三重以徵
解愆斯歲多不給諸軍無措率倚辦于帑丁輾
轉逋逃尺籍幾廢在在皆不耕之地人人皆不
餉之兵雜虜覬覦計不旋踵無地非虜無時非
防當事諸臣視各鎮愈益難矣諸軍悍然敢戰

奮不顧身徒以恭養未克技擊未習虜示之弱
輒入穀中雖用馮河鮮不及溺其勇不足恃也
獨鎮守標下軍丁可博一戰然亦乘彼無備奪
其志而先薄之藉令堂堂之兵一當大舉未敢
必有功也撫臣以收保爲完策以輕率爲寡謀
增堡戍繕路臺以通往來修邊牆濬路壕以距
馳騁虜至則無所掠退則備之如初或有可乘
幸得一擊比年斬獲幾至千級職此之由卽未
能豫伐虜謀戍亦可無大失但令煩而食少力
詘而舉羸誠宜增軍餉以安士心益軍需以除

戎器夫然後敵愾可作教練可行否則憂在蕭牆不可不深長思也保定爲

京師右臂北連上谷雲中廣昌蔚州川原平曠自昔已通大虜頃虜聚謀東犯稍得息肩假令改慮而西紫荆則其故道也去

京師僅二百里所不如薊者幾希先任巡撫朱大器奏留馬價銀一萬兩修築邊牆誠爲防守至計旋以陞任未及興工原任總兵官李勇乘之意在推避及巡撫朱繼代任關說百端萬金不免查盤將扞文法請亟還部以弭弊端比繼未

及致詳將從勇議賴易州兵備副使高文薦力
格其議未行總亦徐察其奸卒圖修繕屬該道
歷諸障塞萬雉一新信如勇言西鎮卒於不振
矣迨今巡撫孫丕揚受事首閱邊工程督材官
刻期而告成事先是撫臣建議悉罷易州防秋
諸軍於是甲仗毳毼百無一具今始爲之措處
增葺更新乃屬總兵官傅津合八營爲全部列
行伍中號令而訓習之憑軾而觀軍容肅肅此
興廢之效也顧邊關雖設而斷續出入未有定
形軍餉雖優而部署教練未有成法本部方奉

明旨行臣等勘議修建邊臺誠爲要務自是而精練
固守撫臣亦將銳意舉行然必假之歲月而後
可也夫薊遼保定輕重難易不同總督鎮巡智
力心思亦異

明命具在臣請據實評騭之總督薊遼保定等處軍
務兼理糧餉兵部右侍郎兼都察院右僉都御
史劉應節溫溫中理蹇蹇匪躬內外悉合乎方
員始終一歸于精白屹若泰山物議橫興而獨
立不懼炯如止水容形雜至而明鑑無私守舊
章而勿失舍已從人屈羣策而無遺折節下士

覘塞外度虜形利收墉隼蒞部中祛吏弊察見
淵魚經文緯武獨秉全材尊主庇民允符宿望
卽今督府程功亦越三載重以薊門歷任幾及
八年從事獨賢鞠躬盡瘁宜膺殊擢用荅積勞
整飭薊州等處邊備兼巡撫順天等府地方都
察院右僉都御史楊兆博雅多材豁達大度戰
守久諳乎地利弛張各當乎人情拊循則間伍
歸心訓練則旌旗改色制勝中權明若觀火交
歡上將利可斷金廣忠益分部各盡其情省供
需有司悉無所預允矣折衝樽俎居然保障邦

畿期近給由課當進秩巡撫遼東地方贊理軍
務都察院右副都御史張學顏老成得體鎮密
成章窮邊七任有如熟路輕車多壘孤懸無論
盤根錯節當雜虜之跳梁決策不遑朝食課材
官之殿最提衡不爽秋毫堅壁清野地方繫之
爲安危積倉裹糧士卒與之同甘苦料敵可當
宿將在師不忝丈人自昔斬獲多功迄今深厚
不伐宜從優渥兼恤艱難巡撫保定等府地方
兼提督紫荆等關都察院右僉都御史孫丕揚
正色立朝慷慨論事巡關按部練達通方下車

而周行邊徼思患預防傳檄而首詰戎兵當務
爲急審便宜應聲如響防要害視國如家誠與
才合務實效而耻虛文慮在事先舍近功而勤
遠略似當久任可責成功總理練兵事務兼鎮
守薊州永平山海等處地方總兵官戚繼光百
勝起家孤忠殉國堂堂節制之師用衆如寡矯
矯張皇之氣轉弱爲強考功而稽部曲葺月糧
一萬七千分局而定軍儲省歲餉二十四萬立
華夷堂陞之防金城上國洗將士脂韋之習砥
柱中流虛心自下咨謀務出什全直氣不回利

害寧辭百折奮身誓滅匈奴勿問家人之產壯
志不忘溝壑恒存國士之風樂東三捷聞風已
憚先聲薊北專征計日可收底績此則艱難不
避寵利不居南北十年始終一節宜加顯秩用
獎膚公征虜前將軍鎮守遼東地方總兵官李
成梁師貞迪吉士勇知方門庭不入苞苴衽席
不忘金革跋歷三韓籌四方無勞借箸奮揚一
旅取千級有若探囊知彼知我進止咸宜得地
得人修守足賴遇薊門當須虛左校諸部何負
當先雖屢經獻捷晉錫已蕃而戒在持盈謙虛

未滿鎮守昌平總兵官楊四畏恂恂儒雅皎皎
廉貞遇事不辭胼胝繕塞上之臺垣治兵不事
紛更按河東之紀律

輦轂近郊人言無間

園陵重地戍守有裨權輕而多擁格惜乎未究厥施
任久而得機宜庶矣不變其塞鎮守保定等處
總兵官傅澤三邊宿將千里長城身蒙矢石當
年血戰猶存習富甲兵挾日軍容可覩懲前任
之貪殘繼以廉靖憫衝塗之困憊寓以調停雖
云發蹤指示必待其人要以効力馳驅不失其

九
卷之六
範事方虜始績可保終以上諸臣功有差等若
總督劉應節薊州巡撫楊兆總兵官戚繼光遼
東巡撫張學顏總兵官李成梁均之勞績已著
應遵

勅諭題

請陞賞保定巡撫孫丕揚總兵官傅津均之履任尚
淺勞績方新昌平總兵官楊四畏歲有勤勞事
無推諉應

請久任量行賞賚者也近革任鎮守保定總兵官李
勇逆如梟食暴若虎冠舊爲薊遼軍門中軍適

遇總督楊選下吏恣意大開騙局託言重賂權門本鎮括軍費共二千私侵入已今巡撫孫丕揚先在按部畢得其情每道解贖金各四百公取歸家今總督劉應節先任井陘親當其事于時一黨同謀叅將則李康民承差則崔錫瓜分而皆得計其後相機抵罪康民以私縊崔錫以官刑徂引而各伏辜顧惟網漏吞舟乃復營陞專閫至則急償京債因而賣放軍人每月納班者各三錢一時歇役者以千計軍伴陳旺申擁等辦納中軍張茂楊虎等經收計亦不貲沿之

爲例其甚者則馬死軍逃芻餉俱應解部歲侵月攘鎔銖無復還官一年扣月糧布花銀各二百兩千戶苑珍周道等授受實收可查四年扣馬匹料草銀共三百金把總白素安居等交收底數可驗奇兵營扣逃糧二十四箇月斷事司收折色二百六十金都司劉喬壽朱時熙把總薛朝棟等解數甚明庫子王治寧劉賢司吏王崇愛等轉交如數定州經歷曹文周前年承委查盤已將發覺該鎮親人李恒百金親爲過送竟復朦朧東鎮撤防則都司李寶百兩吳芝五

十兩科罰無名中軍見面則中軍坐營百兩把
總五十兩誅求有例占役工匠數百人怒輒淫
刑因而捶死者軍人龐僧兒等七十四命強買
赤金一百兩價惟半給爲之私賠者行戶尹川
等六十二家二營藉買馬以爲名色每年各科
銀百金歷任四年而貪求不已各軍因補馬而
領椿朋每匹各扣銀三兩買補五百而暴斂無
厭需求則卓椅圍屏自關隘而運私家載道不
絕與販則硝鹽菜種主家屬而射民利囊括無
遺播惡則縱子買軍糧買官俸壟斷承家宣淫

則挾妓小秀卿小雪仙宴私侍寢借放債舉人
王開銀一百兩加月息三分餽當路不收詐匿
而復派軍償債受犯姦監生司邦澤銀五十金
金首飾一副囑該府不聽強吞而任入市呼名
凡諸穢跡大端各有花名細數猶多顯狀未易
縷陳要以指稱打點恩所不原侵盜邊糧罪在
無赦況復推諉誤事相應比照失機之臣者應
遵

勅諭叅劾者也其餘各鎮善後事宜容臣各另具
題以備

採擇伏乞

勅下本部覆議如果臣言不謬將劉應節楊兆張學
顏戚繼光李成梁陞賞從優孫丕揚傅津楊四
畏量賞久任李勇嚴行法司提問照依律例擬
罪追贓先行分別議擬取自

上裁庶幾賞罰咸服其心文武各得其職邊政修舉
永保無虞矣

太函集卷之九十二

終

太函集卷之九十三

新都汪道昆伯玉著

疏二首

叙錄效勞官員疏

題爲虜衆內附邊患稍寧乞及時大修邊政以永
圖治安事據本部職方清吏司郎中左熙整飭
密雲兵備副使王一鶚會呈蒙臣案劄准兵部
咨該總督薊遼兵部右侍郎劉應節巡撫遼東
右副都御史張學顏鎮守遼東總兵官李成梁
各題遼東合鎮應修城堡墩臺牆壕等項工程

已經責成寺道將領分調軍夫丁餘量行措處
錢糧分工修理完備乞行覆勘將效勞文武官
員分別叙錄修工軍丁原未給與口糧工食併
乞

請發官銀一萬餘兩量行犒賞等因該本部議覆題
奉

欽依行閱視侍郎汪道昆從公閱視要見該鎮修完
工程的有若干是否堅固足堪經久及查經理
總督撫鎮各官併效勞大小文武等官應該作
何叙錄修工軍夫作何犒賞應給官銀作何處

發逐一查處明白分別具奏以憑覆

請定奪等因准此備行各職督同分委各官通將該鎮修過工程等第効勞官員職名逐一查勘造冊呈報以憑覆覈回

奏等因依蒙分定詳允轉行撫寧縣知縣張彝訓勘視寧前密雲縣知縣邢玠勘視錦義河間府同知李學禮勘視廣寧永平府同知陳王道勘視遼陽寶坻縣知縣王家相勘視開原廣寧通判竇文勘視險山職等督同各官查照題開各項工程隨處覈勘內有見修大小城堡墩臺二

百七十八座不日告完其餘修完各工俱各堅固足堪經久並無虛報通將經理效勞文武官員職名工程多寡數目造冊呈報到臣據此案照准本部咨前事該臣遵奉

欽依隨邊逐一親閱及備行郎中左熙副使王一鶚分委各官查勘去後今據前因該臣覆覈無異竊惟備虜莫要於守邊守邊必先於設險近該薊昌二鎮修築邊牆邊臺巡撫張學顏先任薊州兵備副使時方經始從事其間業已親巡其工亦且親見其利矣及其人遯受事銳意修舉

然以遠視薊難易相懸錦義迤東一望沙漠較其扼塞不足以當薊之什三遼兵不過八萬月餉不過二錢五分較其兵力多寡羸詘不足以當薊之什五其議初下境內譁然危言譁張惟務阻撓巡撫張學顏顧能排羣疑以決策冒衆怨以圖成身任安危首爲䟽

請總督劉應節力主其議時申

明命以飭庶官乃就邊堡路臺通行相度䟽者議增圯者議葺薄者議厚卑者議高加圍垣以護臺加敵臺以護堡加角樓以護垣外修邊牆濬路

壕以防馳突乃布式於各寺道將領期以協心
蒞事畫地程功由今閱之共計修完城堡一百
三十七座鋪城九座開廂四座路臺屯堡門角
臺圈烟墩山城一千九百三十四座邊牆二十
八萬二千三百七十三丈九尺路壕二萬九千
九百四十一丈工以一時並舉後以兩歲垂成
維今居者恃堡垣爲帡幪行者望路臺爲家室
大舉無所於掠零犯亦寢其謀窮邊孤懸賴以
收保殆亦不世之利也惟諸軍之從此役也月
餉素薄緇銖未增又有無糧餘丁裹糧而往者

什之五六既儲灰甕之料又任畚鍤之勞賊至則荷戈賊退則執杵鋒鏑在目土木在肩者兩年無間日矣臣閱之行間其憔悴困憊之狀尚有未甦者共計所費僅止用銀二千六百五十八兩八錢五分九厘六毫穀米麥秣五千六百一十四石一軍所受儉于投醪上之則以義動衆而事必有終下之則以義奉公而先事後食猶之無米而且餽粥不秣而歷羊腸所據前項官軍勞苦異常委應叙錄犒賞除從事微勞該鎮已行量賞或有細過隨事已經薄懲及原題

效勞後經革任者難准叙錄用過錢糧候巡按御史另行查覈外爲照錄官以工之多少難易爲次犒軍以工之大小爲差是役也總督侍郎今陞都察院右都御史劉應節永圖石畫樹千里之金湯遠振風猷作三韓之屏翰巡撫右副都御史張學顏矢志經營以身而爲保障傾心鼓舞不費而底成功督撫二臣其心共苦其績並隆所當各加陞賞者也鎮守總兵官李成梁且修且守期不負于干城任怨任勞功早成于畫地所當並加陞賞者也文職如寧前兵備僉

事李松分巡兵備僉事賀溱死馬寺卿朱奎行
太僕寺少卿朱應時分守遼陽副使李鶚開原
兵備叅議王之弼或當凋敝之區而拮据盡力
或守繁難之地而胼胝不辭非苦下同於諸軍
焦勞更甚於諸將俱應叙賞而李松賀溱李鶚
王之弼各當其難應議加俸者也武職將領如
寧前叅將今陞副總兵楊騰錦義叅將郭承恩
廣寧車營叅將馬文龍海蓋叅將王永祜開原
叅將郭夢徵廣寧遊擊今陞險山叅將傅廷勲
鎮武堡遊擊唐朴瀋陽遊擊張廷賞清河遊擊

曹藍原任遊擊今任右屯備禦徐國輔原任遊擊徐惟忠工必身親不啻日省月試勞以歲計無間暑雨祁寒併應叙賞內馬文龍郭夢徵郭承恩修理獨多應議加級徐國輔徐惟忠獨修一堡應議錄用者也坐營守備備禦提調堡官如中軍楊五典前屯備禦葛景嶽寧遠備禦李汝謙義州備禦祝應乾廣寧備禦王惟屏鎮靜堡守備王大璋海州備禦孔思魯金州守備姚大節江沿臺守備周之望汎河備禦柯萬撫順備禦裴承祖中固備禦楊謙蛟陽陞任守備王

有臣開原備禦蘇國賦提調中前所指迺吳彊
中後所李思喬守鎮安堡今陞鐵嶺備禦郭衛
民守鎮興堡千戶陳大魁提調中右所今陞滿
陽備禦王國瑞守平洋橋指揮常春以上各官
分理勤勞均應議賞若陳大魁吳彊獨修一堡
其功獨多則又應議錄用者也查據軍夫完報
工程各計工料所值少者動以千計多者殆亦
不貲該鎮庫藏空虛無可措處相應量給千百
之一以示不忘其勞內如創修平洋橋新安堡
二座每座量給犒賞銀一百兩城堡關廂全折

修完者四十八座每座給銀五十兩半折併加
補修完者一百座每座給銀二十兩路臺圍牆
角臺創修折修者五百二十八座每座給銀十
兩半折加修者一千四百六座每座給銀五兩
約共該銀一萬六千九百一十兩查得定遼前
庫貯有

欽賞官軍支剩銀二千五百五十二兩仍欠銀一萬
四千三百五十八兩合

請戶兵二部修邊銀兩給發仍行巡撫張學顏俟各
工俱完督行各道嚴查原修軍夫照數均分驗

實支給完日聽巡按衙門覆查明白造冊

奏繳以防虛冒以杜侵剋如蒙

勅下本部覆議將効勞諸臣分別錄叙犒賞軍銀早
爲給發則佚道使而勞者忘勞信實行而勸者
加勸矣

旌別將官功罪疏

題爲旌別將官功罪以彰勸懲事臣惟今之邊務
責之將領者居多其制勝在總兵而用武在諸
將頃

皇上納言官議

命羣臣各舉將材臣夙夜行間皇皇然惟程材是務
茲幸舉事已經先主將功罪從督撫以

聞顧自偏裨以至提備各官其功罪莫不較著臣親
得之聞見者敢不直陳該臣查訪得薊鎮統領
中路南兵副總兵胡守仁制閫全材帥師長子
自昔功高海上于今業擅灤東經營剗剗事事
政觀鼓舞輯和人人用命茹苦茹辛亦自神怡
澹泊任勞任怨何當鬼瞰高明凡在偏裨獨爲
骯髒協守西路副總兵張臣志存鵬擊氣負鷹
揚孤軍犯不測之虜陷陣先登比歲當無警之

秋枕戈求戰久矣自甘馬革惜乎未習龍韜協
守東路副總兵史綱清修自勵素履不愆賢聲
以廉靖擅場戎事以從客入穀力能綜理謀可
贊襄三屯營左營叅將史宸壯志超羣奇才合
轍斷杯棬以從母訓審穀率而得師傳湯泉之
合練不言而喻意幾先界嶺之偏師不戰而伸
威塞外假之淹貫可代指麾燕河路叅將聶大
經器度安舒才華凌厲革役占以稽失伍慎關
防以備非常近以移官尚需效用統領東路南
兵叅將楊文奮跡問閭致身障塞南紀累封京

觀東防獨過陸梁雖近加銜尚堪重任密雲中
軍叅將徐枝外無邊幅內有廉隅累任開府督
府之中軍悉革春防秋防之常例三年進秩萬
衆騰歡遵化右營遊擊陶世臣營陣肅齊臺工
壯麗杜私門苞苴不入清尺籍行伍自乞武有
善經軍無私役三屯營中軍遊擊謝惟能老成
謹恪鎮靜安詳加其秩似難隸之中軍量其材
仍應徙之各路密雲標下右營遊擊李逢時久
墮因循近知激發神解而悉中肯綮雄飛而莫
禦繞三屯右營遊擊吳惟忠一軀精悍百戰

勤勞捐粟而部士歸心援枹而屬夷喪膽密雲
輜重營遊擊陳伯懌希蹤投筆勵志請纓從宿
將而服韜鈴練精兵而成節制可當盤錯不止
偏裨入衛遼東遊擊李惟一入衛出援日修歲
守兩鎮相與倚重頻年未獲番休精爽自如緩
急可賴河南春班都司王維藩技能百中謀復
兼優從主將顧領前茅在客兵宜甯上乘秋班
都司崔經從容不迫馴謹無他久淹守備勤勞
猶限都司體統昌鎮白羊營叅將何勲患銷聚
鵠技擅射鵬刷部士之隱占者數千衆彊幹獨

優罷歲例之科求者數百金清操益著徙之要地可卜將來居庸關叅將劉戡射策登科鳴弓中命臺工昔有所裨獨當險僻開稅今無所與具見矜持遠東開原叅將郭夢徵才猷英發志節修明鎮靜而得夷情廉貞而遠市利營修效力訓練知方廣寧車營叅將馬文龍識精一蹶任重孤懸監馬市而奉公署車營而按法勇已占于追剿才無負于鎮安鎮武堡遊擊唐朴遠左驍雄河西翹楚閱工程類多實效修武備具見壯觀保定紫荆關叅將王撫民事諳薊北名

重燕南修甲仗以飭軍容革繡工以克士伍按
圖畫不辭衝暑當鎖鑰無患防秋真定民兵營
遊擊李彥勲操持素謹紀律頗嚴逃糧不取扣
除悍卒亦知禁戢更加練習可備折衝以上二
十二員則一時諸將之選也薊鎮三屯營坐營
葉鰲壯心勃勃苦節硜硜造器悉反羨餘建臺
獨稱首出遵化守備劉閏于叔有濟追問無私
連城已見輯寧一旅猶需嚮用榆木嶺守備王
詔貸粟餉軍椎牛饗士耻逢迎而詭遇務勇往
以直前白馬關守備盧述夙習車攻久嬰關守

攝神姦而心不二鄰勁虜而警無聞將軍營守
備徐視將門有種勞不憚于邊隅公廩無私俸
恒分于士卒桃林口提調劉德溫一變至道赤
心迴異尋常兩歲防邊墨守恒通晝夜石塘嶺
提調王鳳鳴自負琤琤直氣不能俯仰獨行躋
躋壯猷足以張皇一片石提調李尚賢廉貞勁
正無寧枉道事人易直慈良每見推心得士昌
鎮白羊口守備劉允慶克供子職亦服官箴金
水口防禦惟嚴白羊營操持益恪遼東正兵營
坐營楊五典心惟惕若貌則魁然三軍賴其拊

循累戰爲之踴躍廣寧備禦王惟屏矜持寡過
幹理多材聽斷則兩造稱平懷柔則諸夷得所
寧遠備禦李汝謙年方可畏才亦非常增埤垣
而五堡皆完補士馬而一軍自足海州備禦孔
思魯撫夷得體逐虜著名戰守已具全材營繕
不遺餘力保定白石口守備朱家將任方朞月
才則兼人池臺獨擅金湯埤垣不施粉澤以上
十四員則皆一時材官之選也于內胡守仁可
當南北大將張臣史綱可當山陝大將史宸郭
夢徵近則可當本鎮副將久或可代本鎮主將

李惟一可備薊遼副將楊文何勲謝惟能唐朴
聽改衝要路將王維藩可備薊鎮遊擊崔經應
改各省都司聶大經徐枝李逢時陶世臣吳惟
忠陳伯懌劉戡馬文龍王撫民李彥勲葉鱗李
尚賢劉允慶孔思魯朱家將俱應久任責成劉
闊王詔盧述徐槐劉德溫王鳳鳴楊五典王惟
屏李汝謙俱應量材擢用均之有功邊務所當
薦揚而胡守仁張臣史綱史宸李惟一何勲節
年勞績頗優近日陞遷未及應議加級量賞者
也馬蘭路陞任副總兵楊鯉問關五載歲計有

餘精白一心人言無間九防率多胼胝合練尤
效馳驅墻子嶺陞任叅將孫朝梁敢戰灌夫報
讐伍相騎射素優諸將爲之避舍韜鈴益習窮
邊賴以當關馬水口陞任副總兵宋蘭特立敢
爲長慮卻顧善始善終五紀之清風滿地實心
實事一方之高壘彌天薊鎮巡撫標下聽用原
任叅將李信久從

王事有志建功追論父愆無辜褫秋具體可希上將
側身僅守中軍雖追越石父之刑未試崇伯子
之用總理標下聽用原任叅將吳良知勇踰北

產威震南征死生置之度外穿喉之鉛彈猶存
衆寡引之穀中滿腹之甲兵具在遼東總兵標
下聽用原任叅將黑雲龍承家殉國抱憤戴天
輕身累敵羣醜足贖前愆賈勇可當萬夫尚胥
後效保定巡撫標下聽用原任叅將胡懋功猷
爲已練創艾復深撫馭則惠愛並行傳宣則申
令備至謀資帷幄色動旌旗以上楊鯉等三員
雖已轉官而聲績猶烈李信等四員俱堪使過
而效用維新均之有裨邊防所當併薦者也至
如石門寨叅將張拱立禦寇屢試戰功而精明

不足海蓋叅將王永祐守官卒鮮物議而馴雅
有餘黃花鎮叅將靳付遇敵可奮一擊而未審
機宜石塘嶺副總兵陳勛間虜悉得羣情而不
知訓習清河遊擊曹簠猛鷺足以冠軍不無縱
酒淫刑之過馬水口叅將滿朝相奮揚足以作
愾惟聞科軍造冊之疵曹家寨提調李如梗駿
逸不羈而合練偶蹶永平守備李惟學偉長可
覩而直任爲難率皆大醇而小疵未免龜長而
筮短尚胥其定未敢預謀他如歷任尚淺則統
領西路南兵副總兵陳其可墻子嶺叅將羅端

橫嶺路叅將李時險山叅將傅廷勲倒馬關叅將劉世恩統領保河民兵遊擊王通山東秋班都司劉需密雲守備張玠大毛山提調徐從義義院口提調陳忠勇略夙占挺發才猷已見端倪俱俟久任成功未敢併薦其餘各部中軍千把總則薊鎮千總王添職金福等昌鎮千總李進賢等遼東千總張志遜等保定中軍李桐等共三十二員免置並起中林魚貫猶淹下位容臣另行列名署考咨部附簿備用不敢瀆陳臣又查訪得薊鎮古北口叅將谷九臯幹濟則才

如樗櫟營求則利盡芻蕘官任故鄉或以併兼而賈怨守當衝塞日惟沉湎而甘心撫賞未協吏情操練罔諳兵法冥行幾爲少炒蠻所虜妄作皆爲潘一麟所愚似此乖張豈堪要害大水谷遊擊王汲蠅營狗苟狐媚狼貪藉武舉以爲階梯任守備以容谿壑三衛任受詞而科罰百屯率越例而誅求柴炭徵銀解府則除耗銀貳百兩鎮撫馬鑑周知遞運買牛駕車則扣牛價六十金牙行會約明証獲私鹽而不報官與指揮劉乾私分其利取段疋而不給價致舖戶徐

月明揭其非陞任未聞賢聲造言務傷善類華
其見任尚有餘辜密雲標下左營遊擊孟杰兩
耳不聰一籌莫展會閱而首受失律之罰偏執
而終無補過之心歷任既已踰年治軍猶未成
列權下移于吏胥漫無決策事中制于兄弟情
有煩言諸將具瞻匹夫奚賴臺頭路遊擊王軫
始猶黽勉近已恣睢扣軍糧以飾廚傳月各二
錢占軍匠以刺繡文數至累百比馬之科罰過
多厲政已播監司之檄納班之箕歛無已惡聲
方騰載道之碑工作濫興團操久廢曹家寨遊

擊任良相年侵遲暮力就衰頽平居未練一兵
會閱難迷衆目各營坐矣而本營奔走不遑各
營散矣而本營營伍未定按罪殊非尺短掄才
未見寸長要以闢葺無能終于委靡不振河南
春班都司陳檠一軀擁腫四體艱難坐作百爾
不堪馳驅一無所用遼東寧遠叅將胡堯勲透
巡畏縮苟且因仍署事曾有科求復勒還干事
後復官卽圖報復每肆虐于軍前憂衝路之難
支垂涕而道共事者爲之寒心任零賊之屢入
充耳不聞行道者爲之失色在諸將最爲怯懦

雖新任難保疎虞遼東軍政管局都司田永管
局五年署印二次受詞約有千計枉法何嘗百
端招權納賄內則田二漢祁管家說事過錢外
則張應祥羅門子自指揮徐翦千戶李冠康維
以至百戶周國相自富戶吳志舉居民張明和
劉二楊承章同四周友才邵承聘以至礦徒徐
應祈或以人命或以家財或以姦情或以賭博
其事歷歷可查或索金銀或索犀帶多至二百
少至二十其賊一一可數甚則強索逃軍徐澤
等二十名納贖刑于私室任用姦黨王月等三

四輩索方物于朝鮮庇護近習則解伍之批文
久稽傾陷長官則投院之原呈具在凡諸顯跡
莫罄名言保定原任紫荆關副總兵張玘鼠目
獐頭奴顏婢膝庭謁監司甚至免冠叩首路逢
使客胡爲曲跽當車患失鄙夫貽羞武弁薊鎮
董家口提調范君寵旣乏清修又多粉飾月糧
布花扣作無名之費墩軍樵採計非惟正之供
撫夷旣出公儲沿例不遺私歛昔已冒功不耻
今猶恣意無良長谷城提調周相縱子宿娼主
妻放債門內違言忍心而誣子婦閨中長舌造

意以挾服兄自言埋地有金夫豈守官無玷石
峽谷守備孫堂宦未成而已怠官始復而卽偷
城工停閣付之不修軍伍逋逃置之不問曠職
如此將焉用之遼東原任撫順備禦齊可憑藉
攘功夤緣幸位張威足以箝人口用罔足以飾
已非撫夷則私賂倍千往時給賞則歲例加千
舊額皆以其一今則二之酋首之縱橫有自用
以其一取則什之窮軍之控愬無門通委官鮑
禧侵馬市稅銀五百兩差軍出換松板運私家
而得價不貲遣軍人元守義用牛換人參三千

斤篋法不納稅銀轉都市而獲利無算強搶夷
板入城不與平值貨物致夷人勒給荅等進搶
無時私通雜虜入貢盜賣別衛

勅書索夷人來力紅等行賄有跡今日販貂皮明日
販人參明日販松板擅用官車而絡繹不絕先
呈修所城次呈修關廂次呈修路臺徒具公文
而尺寸未完釀夷釁已及三年致虜情變于一
旦彼竟脫身而漏網後皆駢首而伏辜將領因
而連坐者近十人兵食以之耗損者以萬數人
心共憤

國法難容長安堡備禦高雲衢陞級由于買求肆
行無所忌憚通姦汪景陽軍妻已經叅罰毆死
靳樂軍命又復買和擅開荒田則勒富戶王世
爵等六十兩私收子粒則占操軍鄭表山等二
十名指墻壕而索軍丁各三兩受害者李六等
五十名造棹椅而運私家各百張占役者張成
等數十衆修堡則科長定堡張朝相長靜堡孫
良臣長寧堡唐信長安堡吳世勲等各二十金
貪心愈熾宣淫則姦占家丁徐國用妻李氏門
子袁京妻劉氏軍人周三兒妻尹氏軍人黃祿

妻强氏共十餘輩穢德益彰人類已非官常何
在長勇備禦范芝貪自性成官由賄得昔在中
軍任軍伴黃文舉千金科索旣多顯跡結通判
于廷光百計彌縫李景春等長勇長勝各一堡
每堡科銀六十金王勛等王綱武靜十二屯每
屯收豆三十石姦軍人劉承學之妻則王教讀
爲之科斧挾住戶郭大倫之賄則屠門子爲之
置果旣肆貪婪豈容假貸保定浮圖峪守備李
紹先先爲紫荆中軍繼授烏龍把總衛千軍而
納月班胡叅將之禁諭猶在役百工而造私器

李六兒之押運爲勞及轉浮圖益事科索營陞而告助隊軍各五兩識字于海爲之經收漁色而姦占義婦爲通房家人魏倫因而逃遁官箴大壞人心久離插箭嶺守備王立極龍門描惡免窟潜踪與識字許仲倉同謀任軍伴劉在生事每歲科軍三百金因刑併而逼管隊姜瓚自殺合營攤銀八十兩托戶頭而與屍母焦氏私和方漏吞舟復遷插箭父喪明歛助葬一百金擅離信地公用月科支應二十兩盡入私囊指進京打點放班而納月例三錢數至二百家人

王安齋行指赴鎮閱操無故而扣軍糧三月月
各捌錢管隊李驢兒作証且外多酒過內作色
荒厥有司存尤難姑息以上十七員罪狀雖或
不同邊防均爲失職于內谷九臯王汲孟杰田
永張玘周相齊可高雲衢范芝李紹先王立極
俱應革任而齊可仍應行巡按衙門提問以盡
其辜張圯徙官稍久賊跡漸湮仍當削黜不叙
以爲諸將頑鈍無耻者之戒陳檠應令致仕任
良相胡堯勲范君寵孫堂俱應降調王軫既踰
官守本難姑留而新敘戰功不容輕棄亦應降

調以俟自新者也伏乞

勅下兵部如果臣言不謬卽將胡守仁等照例陞賞
量材擢用谷九臯等革任齊可提問陳檠致仕
任良相等降調庶幾拔十得三不借材而用足
懲一戒百不建鉞而威行矣

太函集卷之九十三

終